

3. juni 2014

UPA 2014/171
Vittus Maaru Mikaelson

**Nunatsinni qanoq iliorluta, inoqarfiit annerit inoqarfiillu minnerit avinngarusimasullu eqqarsaatigalugit inuuniarnikkut atugassarititaasut, assersuutigalugu nerisassanik peqqinnartunik pisiassaqarneq, kiassarnermut kallerup inneranut, imermullu akit eqqarsaatigalugit, qanoq nammaqatigiinnerusinnaanerput pillugu apeqquteqaat aallaavigalugu Inatsisartut oqallinnissaannik siunnersuut.
(Inatsisartuni ilaasortaq Juliane Henningsen, Inuit Ataqtigiit)**

Siullermik Juliane Henningsen, IA, qutsavigissavarput nunatsinni ulluinnarni atugas-sarititaasut eqqarsaatigalugit qanoq nammaqatigiinnerusinnaanerput pillugu oqallin-nissamik siunnersuuteqarmat.

Siumup qularinngilaa inuiaat kissaatigigipput tamatta atukkatigut naligiinnerusumik atugassaqaarnissarput, tamannalu siunertaralugu Siumumiit ilungersorluta anguniagaqar-tuarpugut. Nuannaarutigalugulu oqaatigissavarput Naalakkersuisut kiffartuussinissamut isumaqtigiissutit suliarinerini tamanna eqqarsaatigalugu eqqummaariffigisarmassuk.

Nunatta isorartoorujussuunera avinngarusimasumiittuulluni immaqa malunnarnerusarpoq, tassami avinngarusimasumiilluni angallannikkut assartuinikkullu periarfissat killeqar-nerusarput, aammalu nioqqutissat akii qaffasinnerusarlutik. Uanga aggerfinniit Tasiilami ukiup ilarujussua umiarsuarnik sarsuasunik takuneq ajorpugut, sikusarnera aamma pissutigalugu. Aamma timmisartunik takunngingajavittarpugut mittarfeqanngimmat.

Ullut tamaasa illoqarfimmiit allamiit umiatsiaaqqanik tikittoqarneq ajorpoq, illoqarfik qaninnerpaaq aamma isorartoqimmat. Tassa taama nunarput isorartutigaaq.

Soorunami inuit ilai illoqarfigisaminniit nuukkusunneq ajorput, perorfigisap qimannissaa, ila immaqa eqqarsaatiginerluunniit ajorpaat ilaasa; tamanna pissusissamisoorpoq ataqqisas-saallunilu.

Eqqarsarnaveersaassaagut inuit tamatta atugarissaarnerunissaq kisiat anguniagarigipput, inuimmi tamatta pingaartitavut naleqartitavullu assigiinngillat, inoqarpoq aamma atukka-minnik naammaginnittunik nunami najukkaminni.

Assigiimmik akeqartitsinerup atorunnaarsinneqarnera ineriartornitsinnut assigiinngitsutigut sunniuteqarsimavoq. Unammilleqatigiinneq eqqarsaatigalugu arlalitsigut iluaquteqarpoq, kisianni aamma avinngarusimasuni atukkatigut ajorseriartitsisimalluni. Taamaattumik aam-

ma piffissaavoq nalilersuinissarput, kisianni aamma nalilersuiinnarata misissuiinnaratalu iliuuseqartariaqarpugut.

Erngup nukinga atorlugu nukissiuteqarnitta ineriartortinneqarnera ingerlaannassaaq, kisianni atorluarnerusinnaasariaqarparput nukik pinngortinneqartoq. Misissugassaqqissullu ilagisinnaavaat avinngarusimasunut innaallagissamut aqquteqalersitsisinnaaneq, atuiner-mut akip appartissinnaanera eqqarsaatigalugu, saniatigullu Co2-mik aniatitsineq appar-tillugu.

Eqqartorsinnaasatta aamma ilagisinnaavaat nerisassat peqqinnassusaat peqqinnanngis-susaallu aallaavigalugit avinngarusimasunut pilersuineq eqqarsaatigalugu kiffartuussinis-samut isumaqatigiissusiorsinnaaneq.

Siumut isumaqarpoq oqallinnermi kalaallit inuusuttut peqataatinnissaat puijussanngik-kipput taakuummatami ilaatigut nunani allani ilinniartut nunatta ineriartortinneqarneranut peqataarusullutik.

Taamatut Siumumiit oqaaseqarluta qujavugut oqallinnissamik siunnersuummut.